

## **s'letschtä kapitel (das letzte kapitel)**

ein mann gibt auskunft, 1930

hüt morge händ's es bracht uf allne statione  
und sither tüend's vo nüt meh anderem brichte  
es bombegschwader vo de vereinte natione  
heg dä befehl di gsamti mänschheit z'vernichte

und d'wältregierig seit, äs segi schad  
dass de plan ändgültig fride z'schtifte  
sich gar nöd andersch verwürkliche laht  
als alli beteiligte z'vergifte

und nöd ei seel söll de nächscht tag überläbe  
und flüchte, so sägeds, hegi gar kän zwäck  
äs bringi nüt, jetzt no am läbe z'chläbe  
will das neue gift chrüchi i jedes versteck

und so started mit gas und bazille ufmunitioniärt  
abertuusigi flugzüüg zu jedem ort  
und begönd wältwiit folgsam und ambitioniärt  
dä vo de wältregiärig befohleni mord

und d'mänsche chrüüched winselnd under ihri bett  
und ränned in chäller oder au in wald  
und s'gift hanget gäl wiä wulche über de shtedt  
und di erschtä liiche ligged scho uf em asphalt

und mänge hofft zerscht no är chäm devo  
aber käne schafft's und d'wält wird langsam läär  
s'gift breitet sich uus und schlicht äso  
dur d'wüeshti, übers meer hinder jedäm här

das isch s'letschte kapitel  
und schliesslich ligged d'mänsche i fulende hüüfe  
und überall hanged's tot zu de feischer uus  
sie triibed, diä wo's gschaftt händ, sich z'ersüüfe  
und langsam gönd überall d'liächter uus

und dampfer schwanked im meer belade mit tote  
und jedäs läbe isch verlöscht uf em blaue ball  
und flugzüüg irred mit tusig tote pilote

brännend wiä komete use is all

so hät sich d'mänschheit endlich fride gholt  
zwar isch d'methode nöd usgsproche human  
aber d'ärde isch äntlich still und zfride und rollt  
völlig beruhigt ihri bekannt elliptischi bahn